


Isle of Man Weekly Times



Skeallyn as Artyn
aachlout voish
Yn Emshyr Shiaghtinoil
1982 - 1984

liorish

Robert Corteen Carswell

Clouit ec 'FRITLAG', 9 y Corran, Ardane Purt-y-Shee, DOOLISH,

Ellan Vannin, IM2 5ET

1998

COADEY NY hINSHYN GOAL
19 Jerrey Fouyir 1982

Cha nel boayl erbee elley kiart gollrish ny hInshyn Goal (ellany feer-heear ny hAlbey). Ta urlee as maarlee marrey as thummeyderyn geddyn slught ayns y reeast, as ayns y phastyr ta ein raip shnoagyraght. Ayns y vagher (she *machair* ta'n ennym cadjin er yn ard rea shen) ta ymmoddee blaaghyn feie as shooylleyderyn ta troggal nyn idd aynshen.

Çheu elley jeh'n vagher, ta traieyn jeh geinnagh shlig gollrish rybba bane ersyn ta tonny y Eearvooir rolley. Shoh boayl feer aalin as taitnyssagh er-lheh da arreyderyn eeanlee. Dy jarroo, s'cosoylagh eh dy vel arreyderyn eeanlee geeck ayn soogh da çheet stiagh turrysaid ny hInshyn Goal.

Agh nish ta cowrey ny çheerey as eeanlee ny hInshyn fo baggyrtys er-coontey jeh plannyn scanshoil dy vishaghey eirinys ayns ny hEllany Sheear. Ta ny plannyn shoh cummit ec Rheynt Eirinys as Eeasteyrys ny hAlbey.

Gyn ourys, ta feme ec yn ard ta goaill stiagh Ellany Sheear ny hAlbey er cour argid. Ta lhiettrymys mooar currit er bishaghey eirinys liorish ooir voal as geayaghyn ta sheidey bunnys dy kinjagh as ram fliaghey as imbagh giare aase. S'goan ta vondeish elley ry-gheddyn, myr shen ta sleih ny hEllany treishteil er argidyn coonee sheshoil.

Ta'n Covargey Europagh cur paart dy argid son Claareyn Bishaghey Slaanit ry-hoi cummal seose earroo yn phobble ayns ardjyn ayndaue ta lhied nyn doilleeidyn ry-gheddyn, agh shoh croghey er claareyn freggyrtagh da coadey y çhymmyltaght. Cha nel ourys erbee ec y Çeshaght Reeoil Son Coadey Eeanlee dy jinnagh Claare Bishaghey Slaanit, ta reaghit son ny hEllany Sheear, assee mooar da eeanlee as beiynt feie elley.

Ta imnea smoo mychione bishaghey eirinys er-yn-oyr dy voddagh ymyd sodjeh jeh sarkyl-nieughyn as keirdeeaghtyn elley noa-emshyragh bentyn rish ardjyn raad ta eeanlee geddyn slught. T'ad kiarail ceau ny smoo na jeih millioon as daeed punt dy lhieneyn nyn Glaare, agh cha nel veg jeh'n argid shoh son coadey y çhymmyltaght.

Ta mysh daeed Buill jeh Sym Skeeandagh Er-lheh ayns ny hInshyn Goal as ard ny ghaa elley by feeu y staydys oikoil shen. Oddagh palchey jeusyn goll er mhillay my vees y thaloo jeeigit as y pastyr mooadit 'syn agh t'ad coyrlaghey rere y Chlaare.

Oddagh çhirmaghey y vagher cur ayns gaue ny piyryn dy ushagyn y Çheltyn ta foast er-mayrn ayns ny hInshyn Goal. My vees y pastyr mooadit, oddagh ny ein raip ve ceaut magh - as ta daeed ayns dagh cheead jeusyn ta foast er-mayrn ayns ooilley ny hEllany Goaldagh geddyn slught aynshoh. My vees y magher lhiasit, ta thaloo fo baggyrt ta beeaghey y çhionnal smoo dy hooylleyderyn ayns Çheer ny Goal.

Va cour argid y Chovargey Europagh croghey er barrantys Reiltys y Reeriaght Unnaneysit nagh jinnagh Claare Bishaghey Slaanit Ellany Sheear ny hAlbey assee erbee da'n çhymmyltaght. Ta'n Çeshaght Reeoil Son Coadey Eeanlee credjal nagh vel lhied y warrantys ry-chur rere y Chlaare t'ayn. Myr shen, t'ad shirrey er aa-smooinghtyn mychione y Chlaare dy vod ee goaill stiagh argid dy choadey aalid çheerey gyn cosoylaght as eeanlee skyoltagh ny hInshyn Goal.

Myr shoh, foddee oaldyn scanshoil goll er freayll, as ec y traas cheddin foddee pobble ny hEllany Sheear cosney cour argid sheshoil er ta feme echey foast.